



INTRODUCZIUN

DA SUR MARTIN BEARTH

In losch ceder! El stat egl uoppen dil retg David e siu reginavel. Mo era quei losch reginavel ei rumpeivels. El ha rut la ligia cun Diu ed ei sefidaus sulettamein da sesez. La consequenza ei stada igl exil a Babel.

Mo cheu vegn il Segner cun la buna nova dil salvament. El sez rumpa giu dil spitg dil ceder in'enfiarla e plonta quella danovamein sil Sion, sigl ault cuolm d'Israel. Aschi pintga ei la nov'entschatta che Dieus fa e schi gronda ei la nova plonta. Dieus sbassa ils loschs ed aulza ils humiliteivels sco ei stat scret el magnificat. Quella via ei era il Cristus ius, naven dil pursepen a Betlehem tochen vid la crusch dil Calvari. Quei ei la via che ha menau el allas Pastgas, ed era nus.

1. LECZIUN

Aschia plaida Dieus il Segner:

Jeu vi prender dil spitg dil ceder°,
 giu da sum sias frastgas vi jeu rumper in'enfiarla,
 e jeu mez vi plantar ella sin in ault ed imposant cuolm.
 Sigl ault cuolm d'Israel vi jeu plantar ella.
 Ella vegn a catschar frastgas e purtar fretg
 e daventar in ceder magnific.
 Sut quel vegnan tut ils utschals a setschentar,
 tut l'utschleglia vegn a serimnar ell'umbriva da sia roma.
 E tut las plontas dalla campagna vegnan ad enconuscher,
 che jeu, il Segner,
 hai sbassau la plonta ch'ei gronda
 e fatg gronda la plonta ch'ei bassa,
 che jeu hai fatg seccar la plonta verdegonta
 e verdegar la plonta secca.
 Jeu, il Segner, hai plidau
 e vegnel a far ir en vigur.

Ez 17,22–24

° Il ceder, ina plonta da guilas che crescha oravontut el Libanon, vala sco la tipica plonta divina.